

甲戌廣德旱災大事記

附浙江
賑務工
作概況

甲戌廣德旱災大事記



優勝劣敗、乃天演之公例、救亡圖存、視人事爲樞機、苟羣策羣力、則無事不可維持、若有始有終、雖巨災亦能補救、稽古有徵、於今尤信、吾廣自民國十六年後、土匪橫行、苛捐繁重、商民已凋敝不堪、農村實呈崩潰之象、詎意上年甲戌、忽遭旱災、赤地千里、爲近百年來所未有、嗚嗚之氓、鬻賣男女者有之、遺棄孩童者有之、饑斃者每日有數十口之多、乞食者各地有數萬人之衆、烏棲失所、鴻嗷遍地、聞者傷心、見者慘目、雖繪鄭俠流民之圖、不能形容其萬一、幸得地方官紳、旅外同鄉、毅力熱忱、共起拯救、始獲減少流亡、安定閭里、此實羣策羣力有始有終有以致之、誰謂人定不可勝天也、此等非常之事、不能不有記載、既可以表現已往之成績、亦可以鼓勵於將來、此余大事記之作不容緩也、此記大略分爲八端於右

(一) 廣宣傳以期拯救

(二) 購柴炭以資救濟

(三) 施棉衣以禦冬寒

(四) 免稅米以救災民

(五) 辦平糶以輕負擔

(六) 施粥廠以救孤貧

(七) 施棺藥以救病亡

(八) 記大事以勸將來

(一) 廣宣傳以期拯救 民國二十三年九月五日、廣德救旱委員會、致余快郵代電、文曰竊廣德僻處皖邊、岡巒起伏、地勢高峻、極少河流、全縣出產、全恃米谷、民十八、十九、二十數年、迭被水旱之災、農村已呈崩潰、中加共匪王金林率眾騷擾、居民更無以為生、乃本年自古歷四月初七日得雨之後、迄今百有餘日、亢旱不雨、不但禾苗完全乾死、即竹木枯萎淨盡、焦黃遍地、觸目傷心、以浩劫頻羅數待哺之民衆、又遭亢旱奇重百年來未有之天災、遂至壯健者紛紛攜眷乞食他方、老弱自殺者日必數起、狡黠者攔路劫奪、及糾眾擄掠食物者、比比皆是、在一個月前、未逃亡之普通民衆、尚有糠粃果腹、樹葉充飢、近則糠葉告空、樹根亦掘食殆盡、查水田受災情形、約可分為三種(甲)在插秧時、已無水可戽、因而拋荒未種者、佔有百分之十、(乙)

秋收完全絕望、佔百分之八十、(丙)曾經屢水灌救之田、日內若得足雨、尚可有十分之一二收成者、佔百分之十、至旱地則雜糧大豆雖經播種、均未萌芽、吾廣比歲以來、農家每至播種時期、均賴典質借貸、冀圖挖肉補瘡、今竟遭此巨厄奇災、生計完全絕望、故哀鴻遍野、哭號震天、倘一親臨而目視之、未有不淚涔涔下、心忡忡憂者也、伏維民胞物與、人有同心、免死狐悲、物傷其類、浮屠七級、不及救死之恩高、善念一絲、同感再生之德溥、務乞設法拯救、藉延殘喘、則十八萬民衆有生之日、皆戴德之年、廣德縣救旱委員會叩微、在余未接此電以前、已得廣德老家管帳人報告、云旱災奇重、余已分函全國振務委員會委員長許靜仁先生、暨安徽省災區籌振會、設法救濟、既接此電、余即召集旅杭同鄉開會、以同鄉會名義、又分電南昌行營蔣委員長、南京行政院汪院長、安徽省政府劉主席、全國振務委員會許會長、文曰、頃准廣德縣救旱委員會徵代電開、竊查廣德僻處皖邊云云(前電已誌、茲不重述)、設法拯救、藉延殘喘等語、伏查廣德一縣、上達徽甯、下逮蘇杭、三省接壤、無論商務交通、及一切軍事行政、在地理上均關重要、現在遭此旱災、民窮財盡、鄉間鬻賣男女者、相望於道、竹木柴炭等物、雖價

格極廉、而人皆乏購買力、故村氓負荷入城、沿門求售、自朝至暮、無人顧問、日則捫腹、夜則露宿、疾病困踣者有之、飢餓倒斃者有之、見者慘目、聞者酸心、雖繪鄭俠流民之圖、尚未足以形容其萬一、邇來萑苻不靖、伏莽滋多、共逆游魂、到處煽惑、聚此十餘萬顛連無告之民、萬一爲生計所迫、挺而走險、星火可以燎原、涓流將成巨浸、又非調遣重兵、不能立時撲滅、贛匪方臻肅清、豈容別生隱患、是宜爲綢繆未雨之謀、籌工賑兼施之策、俾其生活安定、元氣昭蘇、弭患靖民、事半功倍、夙諗鈞長悲憫爲懷、痼瘵在抱、務懇多方拯救、迅解倒懸、溝瘠獲甦、盜匪不作、將全活一縣之事小、而又安三省之事大、德風翔洽、利賴靡窮、迫切陳詞、維祈矜鑒、廣德旅杭同鄉會叩庚、同時又分電蕪湖鄭翔北、沈子陶、蘇州王均卿、上海王梓廉、安慶陳覺民諸先生、以及其他同鄉、一面電復廣德縣救旱委員會文曰、徵代電敬悉、此次災情奇重、非請各當道迅予籌撥大宗款項、不足以資救濟、貴會分電呼籲、具佩熱忱、敝會亦已分電各處矣、並聞、廣德旅杭同鄉會叩元安、徵陳覺民周崧甫二先生、於上年十二月三十日、致余與陳孟平君一電、對於吾廣災情、囑余等一致呼籲、余與陳孟平君於一月一日即電許靜老、文曰

、頃讀陳言周世筠兩先生卅電、誠懇悱惻、感人至深、循誦迴環、欽佩無似、上年旱災、尤以山鄉受禍爲酷、廣郎兩縣、卽因地多山田、取水維艱、以致一望焦枯、無法補救、居民恃農產爲生活、秋收既已絕望、流亡在所必至、時交冬令、無食果腹、無衣禦寒、壯者散走四方、老弱轉乎溝壑、將見繁蕪之區、倏變荒涼之境、實爲仁人君子目所不忍覩、耳所不忍聞者、文選等誼關桑梓、且文選現辦浙振、救災恤隣、爲應盡之義務、除多方募集棉衣運送分散外、用特專電、一致呼籲、夙念我公病瘵在抱、飢溺爲懷、敢乞速籌振濟、活此殘黎、功德無量、披髮纓冠、時機迫急、涕泣陳詞、維祈矜鑒、錢文選陳鳳章叩東、

余與陳君將致許公之電、轉達陳覺民周崧甫二君知悉、旋得許靜老一月四日復電、文曰、廣德旅杭同鄉會錢士青陳孟平兩先生均鑒、東代電敬悉、廣郎旱災慘重、焦惻同深、查皖省災振、上海各省旱災義振會、案經決議、撥款八萬元、聘弘傘、徐平軒、張澤浦諸君爲查放主任、主持辦理、已於上月數日出發查放、昨接轉到陳言周世筠兩君代電請撥款施振、已經轉電弘傘各主任、提前發放急振、以資救濟、准電前由、相應電復查照、許世英支、以上

函電交馳、皆爲災民乞賑、此廣宣傳以期拯救者一也、

(二)購柴炭以資救濟 吾廣本係山鄉、平時小民生計、多以柴炭爲大宗、柴炭多、以小車推入城內求售、得款易油鹽等物、自旱災之後、村氓得以苟延性命者、皆藉售柴炭爲易米與麥麵以度日、初尚有人購之、嗣因供過於求、價已極廉、每元可購柴八担、炭每箕二角、繼則收買者均已充足、城內居戶皆不需此、且人人求維持自己之生活、亦無餘款購買、終致無人過問、推柴炭由鄉入城、動輒數十里、半日方到城求售、當日尚望返家、孰知柴炭無人過問、日則枵腹鶴立、夜則露宿街頭、受盡飢寒風霜之苦、實爲人間未有之痛、輕則得病、重則倒斃、柴炭與人並亡、而家中妻子兒女、尚倚門而望、不得絲毫消息、當大荒之後、一線生機、僅僅在此、而今並此而無之、其慘痛爲何如也、况柴炭來源不絕、每天湧進城市、日積日多、銷路更滯、似此情形、貧民之困苦固多、地方之治安亦重、官紳無法救濟、事態日益緊張、余得老家管帳人鄭志傑君來函報告、請示辦法、余卽與旅外同鄉、如王均卿、王梓廉諸先生等商之、均主先行墊款收買、將柴炭運至杭、申、蘇三處設法脫售、卽有折本、亦所不惜、均卿先生來函云、如必要時、彼願墊款三百元交余

辦理、余卽復信云、只求申、蘇、能得銷路、款項由余一人籌墊可耳、余當卽電知鄭君、卽日開收、來者不拒、自此以後、因推柴炭進城求售者、既無飢寒之苦、亦無倒斃之聞、於是敝廬空地、柴炭堆積如山、卽囑源源運杭、多則運至申、蘇、有此一舉、柴炭之銷路已通、生計之維持可保、使當時無人計劃及此、不獨死亡日衆、而且治安甚危也、嗣鄭君來函報告、柴炭不可無量儘收、否則當此荒年、所有蔭木森林、被人砍伐一光、無敢過問、爲保障森林計、不可再多收、以後只可見不得已而求售者、酌量買之、余亦謂然、且敝廬實已無處可堆耳、旋有振米到廣、難關可渡、故賣柴炭者亦日見其少、此購柴炭以資救濟者二也、

(三) 施棉衣以禦冬寒 旱災之後、貧民衣服典盡、甚至婦女亦無衣遮體、不能出門、在炎夏尚可支持、如至冬令、卽寒氣逼人、况大旱之後、或有大寒、不可不防、余於上年九月念九日向浙江振務會、商撥舊夾單衣二千件、經振務會開會議決、准予照撥、但夾衣難以禦寒、一面將夾衣洗染、煥然一新、一面飭工將夾衣加裝新棉花、以期耐寒、惟有人云吾廣貧民作工、不慣棉褲、夾褲可耳、故有若干件、專爲男工者、不加棉花、以期便利、而裨實用、

余思災民甚衆、實非區區之數、所能濟事、余特赴申、往商王梓廉先生、承其慨允施送棉衣一千套、皆係新製、所費達一千七八百圓、余仍恐不敷分配、又約同陳孟平君、往商董宅、始云可捐三千元、作施棉衣之用、繼又減爲棉衣一千套、在廣德購買蘇州運來之估衣、三處共有六千件、雖爲數不多、然同人已盡力爲之矣、此項衣服、係王、董、及余自己捐助、並未勸募分文、王董二家如此急公好義、經余一說、卽出此巨款、誠屬難能可貴、捐助棉衣雖不易、而施送方法尤難、寒衣運廣、余卽函請丁子羊縣長收存、轉飭各區保長、擇其極貧苦、確實無衣者發之、同人之意係救濟無衣不能生存者、並非救貧、人多衣少、自不能不稍加限制、各區保長如何辦理、其責任由其負之、捐助寒衣人、以送廣德縣政府爲止、責任已了也、此事承丁縣長轉飭各區保長具領、聞四鄉貧苦之人、受惠不淺、此乃丁縣長及各區保長辦事得力也、今年余回廣、見貧苦孤兒、流落在城、由各學校自行捐款收容、而無衣服者、余又捐助童衣數十套、使兒童有衣、可以回家、此項童衣係孫雨農君代辦、款亦交孫君轉付之、此施棉衣以禦冬寒者三也、

(四) 免米稅以拯災黎 浙江全省振務會、對於甲戌振災事宜急急進行、查知採辦

振米、以洋米爲合算、並知採辦洋米、有免稅護照可以請領、當卽呈請十萬石免稅護照、分發各縣、持照購米、每石可免入口關稅三元、惟浙省之免稅照、只可用之於浙江各縣、吾廣不能請領、旋見上海籌募各省旱災義振會、亦請領免稅護照十萬石、既名之爲各省、吾廣卽可請領若干石、余卽用快函通知做處管帳人鄭志傑君、轉告地方官紳、火速籌款赴滬請領、如不熱悉情形、可先到杭接洽、余可同往、代辦一切手續、以救地方、吾廣人士、初尚不知有免稅米之事、自此消息傳至廣德後、市面米價、遂跌落不少、有米之家、卽紛紛出售、孫雨農君向余言、此余一信之力也、因當時吾廣有米之家、不知有免稅之事、忽聽有洋米可辦、不得不減價出售、恐洋米一到、原有之米、賣價更低耳、余一面有私函致上海各省旱災義振會友人、託爲探聽具領手續、復信云如領免稅護照應從速請領購米、如遲則恐領完矣、余卽函知鄭志傑君、轉達地方官紳、應在三月半以前、備具印文、到滬請領、否則領完、無從設法也、

直至三月廿六日、廣德丁縣長始有代電致余、文曰士青先生善鑒、前承鄭君言及執事在杭、辦理振務、因關心桑梓災情、謂尊處可便爲代辦振米、並能

免稅、逖聽之下、感戴同深、現經民食調節委員會、切實調查、全縣缺乏糧食、約在萬餘石之譜、惟金融奇窘、籌款不易、一時萬難如數購出、現經極力張羅、僅籌得大洋三千元、由郵匯上、懇先代爲訂購三千石、以便陸續運回救濟、茲將呈請上海全國振會公文一件寄請面遞、除派委員面懇鼎力維持外、卽乞速予訂定、渡此春荒、不勝矜盼、廣德縣長丁炳煊叩寢、旋由丁縣長派孔子遠、吳光斗二君來杭、與余接洽、余云此時已遲、不知免稅照已否領完、正擬同赴上海、謁全國振務委員會委員長許靜老商洽一切、適許公因赴黃山來杭、余卽往會晤面詢之、並將廣德縣印文呈閱、許公云各省早災義振會、已無免稅照可發、均已分配定矣、安徽省刻正請領免稅照十萬石、可以逕向本省請領、名正言順、許公允代電達皖省、惟廣德縣長、亦須正式呈請、以符手續、余得此消息、回向孔吳二君言之、卽中止上海之行、當與陳孟平君暨孔吳二君商酌、恐縣府不明原委、遂草擬電稿、由孔吳二君帶回廣德、交縣長核發、俾免歧誤、余並對孔吳二君言、可先行返廣、俟省中免稅照到杭、再電知來杭、同赴上海辦之、孔吳二君所帶購米之款、用廣德縣政府名義、暫存杭州中國銀行、孔吳二君卽返廣也、

旋於四月八日、余接安徽省災區籌振會來函內開、逕啓者、頃接丁縣長卅電、請領免稅振米護照四萬石、逕寄台端收轉、以便赴滬購運等語、查此項護照、已分配該縣兩千石飭其具領在案、所請四萬石之處、業經分配無餘、無法加撥、俟續領到會再行發配、除電復知照外、茲將兩千石護照一張檢送、希即查收應用、見復爲荷、附免稅二千石護照一張前來、正擬發電到廣、適吳光斗君由廣來杭、既有二千石免稅護照、即可憑照購米、似無何項手續可辦、無須余往、余實亦因浙省振務會之事忙碌、不克分身、惟恐吳光斗君對於各種情形、或有未諳、由余面商浙江振務會秘書章俊卿君、專函分託在滬採辦委員周宜九君、暨米業公會會長顧馨一君、及協大興轉運公司總經理董子華君、照拂一切、余即將二千石免稅護照、以及各介紹函、面交吳君、赴申辦之、吳君到申來函云、米已辦好、在杭存中行之款六千元、及蕪湖匯來之款八百元、囑余暫挪借兩百元湊足七千元匯申、當託中行將七千元匯去、中行因余之交情、匯費分文不取、吳君由滬來函云、米決由火車運杭、再運湖州、可免火車半費、惟經浙境、須浙江振務會給予護照方可、余得函後、當商由本會填發杭滬免半稅護照一紙、原議請填全免護照、但全免護照、開

運反慢、不如半費較快、因鐵路管理局方面、對於全免之照、每天限定車一輛、故不如半費照、反不限制車輛也、旋吳君又來信云、不由火車運杭、直接由上海運至湖州、再轉泗安、以免火車上下周折、故將免半費照退還、四月十二日余備函仍交還賑務會、吳君赴滬接洽圓滿、又有人照拂一切、故辦理極爲順手、以後有此經驗、故事事直接辦之、未數日首批之免稅米、即運到廣、災民正苦無米、而地方米價仍昂、得此米到、米價壓低、災民受益實匪淺也、

第一批免稅米到廣、人民爭購、二千石之米、不久即完、地方仍感不敷、余迭接地方人士來信、非再另行設法不可、但地方官紳、亦無法可想、余見此情形、心焉憂之、適屈文六、全紹武、洋顧問貝克諸公、關於浙江賑務會之事、來杭調查、在余處公宴、彼等係各省災區義賑會主幹人物、余乘機向其請求、可否給予吾廣免稅照若干石、以救災黎、因吾廣災民太多耳、屈公云、免稅米照、早已分完、惟分配黃山之米照尚未領購、經余再三請求、允可分撥若干石、但安徽賑務係弘傘法師主任、應由余商明轉函照撥、以符手續、余於次早往謁弘傘法師於杭州招賢寺、適彼因事返杭一行、面晤後、託其

設法、並將旅杭同鄉會公函交被、文曰竊查敝邑廣德上年災情奇重、樹皮革根食盡、曾由縣政府呈請省政府、發四千石免稅護照、俾辦洋米、嗣以分配不敷、只發二千石免稅照、滿望春糧收入、或可補救、孰意今春小麥等項、又遭暴風與奇冷、損害無餘、貧民食糧、孔迫萬狀、城鄉餓斃者無日無之、實屬慘不忍聞、如無救濟辦法、不獨流亡載道、且恐發生治安問題、鄉人一再來函懇求旅杭同鄉設法、爲今之計、只有籌款趕辦洋米、以救地方危急、正擬推舉代表赴滬、向上海籌募各省救災義振會、接洽請領免稅護照、適屈文六省長昨日來杭、當面接洽、屈公云安徽救振主任、係法師擔任、爲統一事權起見、如由法師將敝會公函轉滬、即可照辦、素知法師悲憫爲懷、茲特專函轉懇、務祈俯念地方危急、大發慈悲、速爲轉懇、發給三千石免稅護照、俾可趕辦洋米、以救貧民、公德無量、弘傘法師據情代達去後、旋接五月十五日上海各省旱災義振會、正副會長孔祥熙、許世英、王正廷、王震、吳鐵城來函、內開案准本會安徽省查放主任弘傘法師函開、頃接安徽廣德旅杭同鄉會函稱、該縣災情奇重、前辦振米不敷分配、囑爲轉懇頒發洋米免稅護照三千石、以資救濟等因、查該縣災情確屬慘重、相應檢同原函、送請大會

鑒核、俯賜頒發洋米免稅護照三千石一紙、以救災黎、同深感禱、如蒙核准、卽懇還復等由、附原函一件到會、查本會所領採辦振米免稅護照、早經分撥各省、現已無存、惟各省辦米、均在滬上、如貴會來滬辦米、當爲轉商分撥一千石、以副仁慈、相應函達、敬希台洽、此致廣德旅杭同鄉會、接此信後、忽聞吾廣貧民免稅米、辦理不甚完善、因發籌之事、爭前恐後、甚至銅元數枚買籌、始可領米、又聞每石加售米價二元餘、余聞之以事關全省名譽、究竟真相如何、不能不親自回廣查看、况有領得一千石免稅護照、可省三千之米價、亦須與地方官紳接洽、卽與陳孟平君返廣、比卽往謁丁縣長、當晚召集各界開大會、以便磋商妥善辦法、本城各界均到會、由丁縣長主席、余卽發表意見、云此次來廣、有三點應行報告者、

(甲)因免稅之事、既名曰免稅米、係爲救濟災民而設、故財政部免去海關入口稅每石三元、俾米價減低、人民得以少數金錢、可購多量食米、今加價出售、不獨於災民無益、且屬違背部章、致干法令、一經查出、不獨應補繳關稅、仍受嚴重處罰、故加價之事、應卽終止、至已賣出加價之米究係若干、應照數購米歸還、以惠災黎、而重部令、

(乙)余所請領一千石免稅護照、如不加價出售、自可交由縣政府派員去購、可免三千元之稅款、如仍加價、余恐因之受累、未便交出、只好退還上海、良以將來查出加價之事、必根究何人所領、余代地方辦事則可、代他人受過則不可也、

(丙)因發籌辦法不佳、真正災民、不能領到免稅之米、亟應改良辦法、應由縣政府按照災民冊、或其他調查方法、查明真正災民、即發領米證、持證購米、以期公允、而昭實惠、

討論結果、僉謂以前不知情形、以爲加價出售、可將餘款作爲基金、今既知違法、自當終止加價、已賣之米、照數補還、丁縣長主張由縣政府發給貧民米之領米證、並按照災民冊再行調查、務期貧民得受實惠、有此圓滿結果、余返杭、即抄上海各省旱災義振會函、於六月六日正式函達丁縣長查照、丁縣長覆余一函、內開案准本縣旅杭同鄉會、函請上海籌募各省旱災義振會、准發本縣振米免稅護照一千石、經地方開會、公請執事代表赴滬採辦、以濟民食、除由吳星垣攜帶現款四千元趨前、商承辦理外、相應函請查照爲荷、而丁縣長同時亦復同鄉會一函、旋與吳星垣君同赴上海接洽、因屈文六先生

赴台州、遂與黃伯度先生接洽、而黃君適又不在仁濟堂、許會長亦外出、余與吳星垣頗馨一兩君、趕赴黃宅、而黃亦不在寓、遂留片聲明撥米之事、請其由會給予頗馨一君撥付免稅米之手條、以便照撥、余與吳星垣君返新惠中旅館、夜間即接黃君來電話、云撥米之手條已辦好、送交余抑送交頗君、余復電請交頗君、黃君並云次早即赴南京有事、一星期始歸、余等幸當日起辦妥貼、否則又須延擱多日也、

此一千石免稅米辦好後、旋接省城友人來函云、此次呈請四千石免稅米、安徽省災區籌振會、允係續領有免稅米護照時、再行配發之語、今已領到第二批、廣德可得一千五百石免稅照、並須於七月三十一日以前去領、余即函知丁縣長、請其速派員往領、以免過期、旋於六月二十九日得丁縣長來函、內開頃奉來函、敬悉一是、吾縣由浙江公路運米、承蒙交涉妥貼、深爲感佩、所詢第三次一千五百石免稅米照、已於六月二十三日奉令分配下縣、即召集地方會議、仍推吳君星垣赴滬具領、紀錄在卷、惟此次領照手續、與前不同、刻因皖振會正在結束、所領財部免稅米照、已撥上海總會、由各縣赴上海就近領用、並另辦一副領呈送皖會備案、弟擬將運到之米、出售若干、抽款

若干、卽派吳君首途、便道謁駕、此間已得透雨、田禾插過、將來雨水調和、可卜豐稔、併以奉聞、並附安徽省災區籌賑會訓令一件、內略開該縣免稅護照一千五百石、應照數額備具正副印領、一面將副領呈送本會備查、一面速選負責人員備齊米價、攜帶正領、逕赴上海賑災委員會駐滬辦事處、請領購運、並以七月三十一日以前爲限、一俟辦畢、連同前領護照、一併繳會彙繳爲要此令、旋於七月四日余又接陳覺民君來函、內開廣泗路上運輸振米事賴公接洽、極爲妥善、廣德第三批免稅米照、已由籌賑會函縣府派代表赴滬振會請領、丁縣長應已接函妥辦、如由縣府備函請由吾公代爲就近辦理、尤爲便捷、已電商丁縣長察酌行之、嗣經丁縣長呈請許會長、又准掛免稅米照千石、地方官紳、先後竭力維持共計得免稅米五千五百石、使災民可以苟延性命、余甚深感丁縣長竭力爲地方造福、而各紳士又能羣策羣力、一致進行、得有此結果、此免米稅以拯災黎者四也、

(五) 辦平糶以輕負擔 余在廣開會時、見大衆皆注意災民免稅米、故只研究如何給於赤貧之民衆方法、而未及於次貧民衆之食米、當此旱荒之後、本地無米可買、必須遠道運來、農村經濟破產、決無大宗款項、赴遠道買米、今只發

赤貧之米、而次貧者無處購米、亦屬困難、如欲兼籌並顧、非另設平糶處不可、丁縣長以款項無出、難以辦理、余思一方面有免稅米可買、一方面無米可購、人民必致餓斃、且恐因之發生事端、亦非地方之福、應另行設立平糶處、與貧民米相輔而行、俾資調劑、今地方既無款辦理、而事實上又不能不辦、惟有余個人擔任平糶米之款、商議結果、由余設法墊款三千元、交孫雨農君赴滬採辦、先買三百石、待賣出一二百石時、即將米款匯滬、再購之、分批運廣、源源不絕、以此三千元爲基金、則可周轉矣、所有此三千元息金、以及其他開支、由余個人担任、務使米價壓低、災民受益、當時議定東盛號、黃大有、義臻行、三家代爲出售、於是平糶米亦有辦法、次貧者亦有米可購、地方更可安定、余卽返杭、三千元之款匯滬、交孫雨農君所指定之米店、旋於六月十九日孫君來函、云米已購三百石到廣、每元出售九升、每升銅元二十八枚、既比市面米價較低、且有米源源而來、無形中市面米價、卽爲之壓低、無法再抬高價、人民受益匪淺、不獨本縣人民可得廉價之米、卽切近隣縣各處、亦多來購之、風聲所樹、廣德地方災民、固無缺米之虞、卽隣縣災民、亦沾其惠、良以滬米源源購進、來者不拒、亦不限定每人購量、

繳款發米、得款運米、一切自無問題、吾廣有此辦法、得以實行、孫雨農君之力爲多也、

吾廣既有貧民米、今又有平糶米（貧民米係免稅之米、平糶米非免稅之米、惟比市價較低）、互相救濟、得以維持、拯救災黎、並救貧民、聞辦以來、仗地方諸君熱心辦理、有此成績、誠爲慶幸、直辦至新穀登場、食米無缺、孫雨農君來函申明、無須再續、方始停辦、初議亦是如此、既有新米接濟、自可停辦、俾承辦諸君、可以節勞、停止之後、卽函孫雨農君、凡代辦之人、應分別酌給酬勞金、旋接孫雨農君回信、云諸君不願領酬金、可見諸君熱心公益、至爲感佩、此辦平糶以減負擔者五也、

（六）辦施粥以救孤貧 甲戌吾廣旱災奇重、爲百數十年來所未有、赤地千里、寬食無方、所有樹皮草根、均已食盡、死亡載道、慘不忍聞、地方官紳對於貧民平糶之米、既如上述、已妥爲辦理、使災民不致流離失所、但價雖低廉、尚須以金錢購之、不能施放、良以地方有十餘萬民衆、一概施振、無此財力、不能不有所區別、而對於一般老弱孤貧、以及毫無購買力者、不能不另行設法救之、始由本城商家、如葛守誠等諸君、出而創辦、繼由廣德許珠夫、

孫雨農、黃百平等諸君出而維持、復由許琳夫介紹鈕笠青、沈積甫、劉子雲等諸君、竭力籌款維持之、

余第二次返廣、得知辦理情形、極爲贊許、返杭後卽分函各處友人、如溫選丞君等、略云吾廣災情奇重、人民困苦情形、早在洞鑿之中、上年冬弟曾募集寒衣數千套、余亦自捐千套、請縣發放、前月鄉人來言、皖省免稅米運到數批已售完、缺米甚殷、如無米救濟則地方治安恐發生問題、弟趕回廣德、面商丁子萃縣長、召集開會、因地方財政困難、毫無辦法、然事實處此、有不能不於無法之中設法、弟已向上海各省旱災義振會商妥、允撥免稅米一千石、已與丁縣長商明、應發貧民領米證、他人不得購買、並不得抬價、以惠災黎、但弟思次貧者、亦須有米可購、方得渡此青黃不接之難關、弟又自辦平糶米若干石、故米行不能抬價、且米有來源、人心大定、弟於月前、又趕赴上海、將一千石免稅米辦好、撥出運廣、但老弱及無購買力之人、又不能不設法救濟、已由地方辦理施粥廠成績甚佳、蒙各處捐款已有五千餘金、勉可支持至舊歷六月中旬、逐日災民就食者、約有六千餘人、每日需米八石糞粥、最好能渡過七月、約計尚需米三百石之譜、陳孟平、孫雨農二君迭次來

信商之、第個人能力薄弱、無法可施、回思執事素以慈善爲懷、廣德之事、又甚關心、似此功虧一簣、惟有函請廣爲勸募、俾可渡此難關、無任感盼、旋接溫選丞君復函、內開廣德災情重大、亟待救濟、去臘已蒙放給寒衣、今復籌辦平糶、具徵嘉惠災黎、無微不至、曷勝欽仰、目下廣德辦理施粥廠、成績甚佳、辦事諸事均極熱心、先後由姪自捐及經募共集約有二千元、因與君任泗安鹽棧經理、卽鈕君亦有捐款募去、現上海如王一亭劉翰怡諸公、姪均已去函、請其補助、惟尚無確實回音、張旭人兄處、亦去函相託、聞其已籌有的款、候其交到、擬仍託鈕君轉交、所難者、現在時局不景氣、各業凋敝、勸募殊不易易、幸近日已降甘霖、農田已可插秧、不致再成荒歉、值此青黃不接之際、如能維持過去便無妨礙、是以無論如何、必須設法渡此難關、姪自當繼續勸募、且重以尊屬、敢不竭力、以仰副拯災恤民之至意也、余當將情形函知陳孟平、孫雨農二君、旋接許琳夫君來函、云施粥之款、不能繼續下去、勢將停辦、余卽復函、請其竭力維持、余個人並捐二百元、交其繼續辦理、一面又函催溫選丞君、得其七月九日來函、內開廣德施粥廠、尚

感經費不敷、張旭人兄代募得三百元、業已交去應用、現姪乘鈕笠青兄赴滬之便、由姪與陳勤士先生備函、託其面致王一亭先生、商請設法補助、前日接笠青兄來函、云王一亭先生、以安徽振款、早經用罄、蒙其竭力在各省早災義振會內撥助米一百石、一俟將護照及免稅單等手續辦妥後、即可運湖等語、俟運到後、擬暫存湖州中國銀行倉庫、一面卽屬笠青兄通知廣德諸公、填具收據、派人來湖、將米運去、照此預算、經費所缺已有限、無論如何、總須維持過去、知關度念、用特奉陳、旋接七月十九日許琳夫君來函、云上海史量才先生宅捐施粥廠五百元之款、久未見寄到、囑余函催、余卽函上海仁濟堂振務委員會駐滬辦事處錢鏡平宗台詢之、復函內開廣德施粥廠、早已撥米一百石、此米之款、將由史款萬元中撥出五百元歸償外、尚少二百餘元、已由本會墊付、對於廣德、已屬格外特別矣、而該廠見報載史款分撥中、有廣德一筆款在內、遂以爲百石米之外、尚有五百元、當是誤會云云、嗣於八月十二日、接許琳夫君來函、內開二日郵上草函、並附收條、旋於七日接奉手示、拜悉後、比經奉復、計早投呈、尊助粥廠之款二百元、今已由孫雨農君交到請台洽、粥廠准於二十邊停施、結束情形、容再詳告、先此肅

達等語、

吾廣施粥廠辦理五閱月之久、日救五六千人之衆、募款至六七千元之多、苟非地方諸君子辦事得力、暨各處大善士熱心贊助、不能得此圓滿之結果也、新穀登場後、許琳夫君將粥廠結束情形、並將捐款人姓名、擬刊徵信錄、囑余爲序、誠爲有始有終、吾廣一切之事、設能如粥廠之認真、款不虛糜、功歸實際、則事事不難推行、人人熱心任事、則地方焉有不進步、此辦施粥以救孤貧者六也、

(七) 施棺藥以救病亡 余每年施棺施藥、已行之三十餘年矣、往年施棺、每年至多不過三四十口、良以吾廣風俗、非赤貧及路倒者、從不欲領人施棺、甲戌旱災後、人民困苦萬狀、凡餓死或病亡者、無力買棺、只好請求給予施棺、因此數目增加、上年余一家施出百餘口、幾無法應付、後來據管帳人報告、只好限制在城死亡者、良以木匠亦趕做不及、往年做成漆好、方施出、今則不待漆好已抬去矣、似此情形、誠爲空前之舉、余雖力不能支、然當此災荒之年、不能不竭力爲之、至施藥亦較往年爲多、况當旱年、天久不雨、疾病更多、所以施藥尤較往年爲緊要、胡慶餘堂觀音救濟丹、五洲藥房十滴水、

以及其他藥品、源源寄廣、盡力施送、藉以救活者、不可勝數、半年來、由管帳人鄭志傑君處置得宜、災民亦多感其維持之力也、余思此乃百年未有之奇災、余能盡一分之心力、即盡桑梓一分之義務、余自覺心神安泰、說者謂余身體健適、乃得天之報、余曰不然、天之報與不報在天、人應爲之事、自當爲之、意在圖報、而後再爲善事、則是有心爲善、思想已落伍矣、余以爲凡事但當行其心之所安、初不問有無天報否也、吾廣城鄉各處、均素知余家向來施藥、故紛紛乞取、藥到病除、誠爲異事、同是一樣之藥、(如十滴水)在他處買之、不見其靈、服余家之藥、則可起死回生、此無他、心理作用耳、故甲戌旱災、余見施藥有極大功效、救人較往年特多、余心大爲快慰、此施棺藥以救病亡者七也、

(八)記大事以勸將來 古人云言之無文、行而不遠、吾廣甲戌旱災、爲百年來所未有、而所辦之事、又極重大、所救之人、又屬特多、所承辦之人、及捐款樂助者、又如此踴躍、苟無記載、以示後人、不獨當時捐募款項及出力辦事者、人不知其急公好義、艱難困苦之經過、以爲吾廣旱災如此奇重、內外同鄉、並無人過問、人民不知死去多少也、良以報紙及宣傳品、無非載明旱災

之慘象、而凡拯救經過之事實、無人得知、不獨湮沒辦事人之事績、及救濟之實況、反爲在外同鄉不知者所責備、口雖不言、腹誹難免也、

目下凡辦理大衆之事、無不有報告、以期大衆明瞭經過之事實、上年吾廣旱災經過之事實、爲余知之獨詳、官廳往來之文件、私人之信札、又爲余獨多、良以各項救濟之事、余皆參加辦理、如余不筆之於書、則他人恐無記之者、卽欲記之、而非身親其役、決不知其詳細、與夫其中實在經過之情形、記如不記、故此項記事之責任、余不能不出而担荷也、余作此大事記、不僅在表彰以往辦事人之成績、實期後賢之繼起而益擴充之、天災流行、何代蔑有、萬一將來再遇水旱之災、鄉人士或可檢查舊籍、得知某年某人、辦理災賑、如何經過、地方之人、不能視地方之事、不加注意、既有成例在前、古語云人之爲善、誰不如我、必有接踵奮起者、出爲辦理、不使前人專美也、聞者如細味余言、亦知此類記事、非專爲現在之人而設、實注重於將來之後賢耳、

余必須聲明者、余之大事記、又專在揚善、不在闡惡、卽如某米店私買貧民米、希圖獲利之事、余一概不錄、以存忠厚、良以善者傳之千古、惡者遺臭

萬年、所以余之記事、專以揚善爲目的、使舞弊者、自知改悔、以期皆登善域、不再爲非、凡鄉邦之事、最易印入鄉人腦筋、子若孫傳之不朽、吾人雖不能爲地方盡力、要亦不能圖一時之利、遺千古之羞、凡爲地方辦事之人、應存此心、本此善念、而推行之、則惡念自然不存、讀此大事記、俾知所儆戒、不再以私利而廢公益、此記大事以勸將來者八也、

以上記事、既名之爲大事記、其他瑣碎之事、概不列入、余之宗旨、專注重救濟之事、其餘結束報告各事宜、自有地方官廳辦理也、尤有進者、回憶余序廣德施粥廠徵信錄有云、「天下事只患無創始之人、不患無贊助之人、苟能先出以勇猛心、次繼以果決心、終持以堅忍心、誠意相召、四方風從、但既有款矣、而辨理不得其人、則款或浪費、或中飽、災民不沾實惠、雖有善者、覩此情形、亦將相戒裹足、嗣後卽有公益之事、呼助將伯、復誰響應、返觀吾廣諸君子、均以實心行實事、開銷節省、涓滴潤及災黎、信用昭著、實屬難能可貴、且預卜其他事業、必踴躍爭先、同心合力、日進有功、」由此可知吾廣地方官廳、與鄉人士、羣策羣力、將此旱災之年、重大難關、平安渡過、余雖不能一一表揚之、替美之、然甚深感丁子萃縣長、暨地方父老

、努力進行之力、得有此圓滿結果也、惟余一人、見聞或有未周、挂漏知所
難免、尚望邦人君子有以教之爲幸、
中華民國二十四年歲次乙亥冬日廣德錢文選記於杭州定香橋湖外湖莊



浙江賑務工作概況

人類如互爭。則天下亂。如互助。則天下治。此古今中外不易之至理。况救災恤鄰。古所恆有。農村衰落。挽救尤急。上年甲戌旱災奇重。余雖以退隱之身。然爲互助起見。勉徇當局之聘請。出而襄理賑務。故對於賑務情形知之最詳。茲將經過事實。略爲報告。大概分爲四端如下。

(一) 旱災嚴重之情形

(二) 社會不安之現象

(三) 救濟款項之分配

(四) 災民獲救之人數

(一) 旱災嚴重之情形

上年甲戌旱災。災情之重。災區之廣。實爲百餘年來所未有。浙江全省七十
六市縣。未受災者。僅溫嶺、平陽、樂清、瑞安、玉環、慶元、六縣。受災
之區。四民生計斷絕。或乞食於他方。或自經於溝壑。災民始以糠粃果腹。
樹根充饑。繼則糠粃告罄。樹根亦握食淨盡。不得已尋食觀音粉。因此而腹

結致死者爲數甚衆。哭聲震野。慘不忍聞。其他鬻賣男女疾病困踣倒斃者。更不可以數計。雖繪鄭俠流民之圖。未足狀其萬一。各縣紛紛來電報告災况。並請掛賑款。以救災黎。浙賑會辦事人員。加緊工作。事務之忙。爲前此所未有也。

(二) 社會不安之現象

上年旱災發生之時。共匪實力尚未消滅。如當時無拯救之方。災民爲饑寒所迫。一旦附逆。挺而走險。星星之火。可以燎原。况災民人數衆多。設揭竿嘯聚。大局前途。不堪設想。夷考史冊。往往因災祲而發生社會上重大問題。小則一鄉一邑。大則震動全國。即使遣調重兵。立時撲滅。而地方亦已糜爛。且此等人民。係因早荒求食。其情尚可矜原。痛加勦洗亦有未忍。災區遑聞。此發彼應。防不勝防。當時已發生吃大戶之風聲。到處傳播。勢甚洶洶。鄉鎮紳富。率多挈眷避城。鄉警團丁。彈壓防範。晝夜不得休息。大有岌岌不可終日之勢。浙賑會暨省內外地方人士。急起謀拯救之法。請求當局。迅撥巨款。救濟災黎。並由浙賑會會同民財兩廳。派員分赴各縣查勘災情。曉諭災民。靜候發款救濟。藉以安定人心。

(三) 救濟款項之分配

浙江本有賑務會之設。災情既如此嚴重。卽將賑務會擴大組織。除民政廳廳長爲賑務會主席外。並聘請地方紳士張暄初、許紹棟、馮仲賢、金潤泉、諸公爲常務委員。余亦與焉。余兼任總務處主任。章委員俊卿兼任祕書。王委員蘇泉、屠委員鑑淵、周委員季綸、陸委員佑之等。各兼監察執行等處主任。而尤以章祕書事務繁重。各縣亦設立賑務分會。以各縣縣長爲主席。當時浙賑會召開大會。滬上聞入。浙省士紳。均參加討論。研究救濟方法。咸云分途辦理。較易爲力。浙賑會極爲贊成。於是上海亦成立甲戌全浙救災會。認定被災最重各縣。分別派員放賑。計於潛、臨安、昌化、富陽、新登、吳興、長興、孝豐、桐廬、分水、建德、浦江、淳安、壽昌、諸暨、天台、仙居、縉雲、遂安、江山、常山、開化、二十二縣歸浙賑會派員會縣查放。至海鹽、嘉興、桐鄉、崇德、武康、餘杭、德清、上虞、嵊縣、新昌、餘姚、紹興、十二縣由甲戌救災會擔任。派員查放。海甯亦由甲戌救災會商同各慈善團體掛款查放。省政府議決第一次撥賑款二十五萬元。除撥補甲戌救災會五萬元外。所餘二十萬元。經浙賑會開會決定。酌量災情輕重。分別支配

。於潛等二十二縣由浙賑會派員分赴各縣查放冬賑。其交通便利各縣。則按照賑款銀數。配發苞米。山僻縣分。仍發現款。上海籌募各省旱災義賑會。先後撥浙江賑款十五萬元。由義賑會認定杭州市、杭縣、安吉、蕭山、金華、蘭谿、東陽、永康、武義、衢縣、龍游、宣平、松陽、十三市縣。直接派員查放。此外被災較輕各縣。經會令飭就地自行設法籌濟。此二十三年份旱災冬賑之情形也。

二十四年應辦春賑。經浙賑會商甲戌救災會。仍照舊分縣擔任辦理。並經開會議決。以辦理各縣就地工賑爲原則。如有老弱婦孺必須施賑者。得由各縣酌撥一部份核實散放。第二次由省府議決。撥發賑款三十五萬元。除撥補甲戌救災會七萬元外。所餘二十八萬元。由浙賑會開會決定。就於潛等二十二縣。分別支配。並遣派春賑工程督察員。分赴各縣。會同縣長商定辦法。督促進行。惟義賑會前辦冬賑之杭州市及杭縣等十三市縣。應辦春賑。由義賑會指撥浙省賑款三萬元。並推派代表屈君文六王君曉籟來杭。商定准將杭州市、杭縣、安吉、金華、蕭山、等四縣一市。劃歸義賑會。就前次配定賑款三萬元酌量籌辦。其餘、永康、衢縣、龍游、東陽、蘭谿、武義、宣

平、松陽、等八縣。應歸浙賑會辦理。由省政府議決。續撥賑款五萬元。由會分別支配永康等八縣。及呈請補賑之臨海縣。又續請加撥之諸暨縣。各就地方情形辦理施賑或工賑。

(四) 災民獲救之人數

冬賑春賑情形。既如上述。據各縣所報告之統計表。詳細核計。浙賑會所辦二十二縣。受賑災戶九萬五千五百七十五戶。大小口共三十九萬零六百八十四人。上海籌募各省旱災義賑會。查放杭市等十三市縣。受賑災戶五萬零五百九十五戶。大小口共二十二萬零九十三人。以上共計受賑災民六十一萬零七百七十七人。至甲戌救災會所辦各縣。尚未據開報。約計十二縣受賑災民亦在二十萬人左右。是浙江全省各縣總共災民受賑者。有八十萬人之多。誠爲空前之舉。實亦地方官紳維持之力也。

甲戌災情如此奇重。遍野哀鴻。嗷嗷待哺。情勢至爲嚴重。幸經 省政府暨義賑會分撥賑款。並甲戌救災會及各慈善團體。與夫地方父老。協力籌助。始獲救此災黎。渡過難關。不致發生意外事故。而人民亦免流離。閭閻得以安定。實爲地方之幸。任其事者至此乃完其責任。此一年來辦理之情形也。

吾國向以道德爲重。地方人士對於災民。各抱己饑己溺之心。發願拯救。如恐不及。或在會服務。或在外募款。或實地調查散放。或踴躍捐輸資財。此等互助精神。實基於道德之觀念。至堪欽敬。如能本此精神。推及其他事業。協力以圖。合羣以赴。精誠團結。衆志成城。則吾國之前途。其強盛豈可限量也。

乙亥冬日廣德錢文選士青甫記於杭州上天竺山外山莊

中華民國五年六月拾壹日收到



